

PWYLLGOR SGRIWTINI CORFFORAETHOL

Cofnodion y cyfarfod a gynhaliwyd ar 6 Gorffennaf 2015

PRESENNOL:	Y Cynghorydd R.Meirion Jones (Cadeirydd) Y Cynghorydd Gwilym O.Jones (Is-Gadeirydd) Y Cynghorwyr Jim Evans, Ann Griffith, Victor Hughes, Llinos Medi Huws, R.Llewelyn Jones, Peter Rogers.
WRTH LAW:	Prif Weithredwr Cyfarwyddwr Cymuned Pennaeth Dysgu (ar gyfer eitem 6) Pennaeth Gwasanaethau Oedolion (ar gyfer eitem 6) Rheolwr Rhaglen a Chynllunio Busnes (GM) (ar gyfer eitem 7) Rheolwr Gwasanaethau Cyfrifeg (ar gyfer eitem 8) Rheolwr Gwasanaeth (Diogelu a Sicrwydd Ansawdd) (GLI) (ar gyfer eitem 5) Prif Swyddog Hamdden (DB) (ar gyfer eitem 6) Rheolydd Sgriwtini Dros Dro (AGD) Swyddog Pwyllgor (ATH)
YMDDIHEURIADAU:	Y Cynghorydd H.Eifion Jones (Aelod Portffolio Cyllid)
HEFYD YN BRESENNOL:	Y Cynghorydd Alwyn Rowlands (Aelod Portffolio – Trawsnewid Perfformiad, Cynllun Corfforaethol ac Adnoddau Dynol)

1. DATGANIAD O DDIDDRORDEB

Ni chafwyd yr un datganiad o ddiddordeb.

2. DIWEDDARIAD Y CADEIRYDD A'R AELODAU

Cyfeiriodd y Cadeirydd at yr isod -

- Gan gyfeirio at y cyfarfod arbennig o'r Pwyllgor Gwaith ar 2 Gorffennaf 2015, y cafodd wybod fel Cadeirydd y Pwyllgor Sgriwtini Corfforaethol perthnasol, yn unol â darpariaethau paragraff 4.6.16.10 y Cyfansoddiad, na fyddai'r trefniadau galw i mewn yn berthnasol i'r penderfyniad arfaethedig i ymgynghori ynghylch dyfodol cartref preswyl Heulfre oherwydd tybiwyd bod y mater yn un brys.
- Bod cyfarfodydd o'r Panelau Canlyniad Sgriwtini a Rheoli Asedau a Dileu Dyledion wedi cael eu cynnal ac wedi cychwyn yn addawol iawn. Cynhelir cyfarfod pellach o'r Panel Rheoli Asedau yn y dyddiau nesaf. Dywedodd wrth y Pwyllgor bod y Cynghorydd Llinos Medi Hughes wedi penderfynu sefyll i lawr fel Aelod o'r Panel Canlyniad Sgriwtini Dileu Dyledion oherwydd ymrwymadau eraill a rhoes wahoddiad i unrhyw Aelod arall o'r Pwyllgor a oedd yn dymuno llenwi'r swydd wag i nodi eu diddordeb.
- Roedd Fforwm y Cadeiryddion a'r Is-Gadeiryddion Sgriwtini wedi cyfarfod yn ddiweddar. Cyfeiriodd y Rheolydd Sgriwtini Dros Dro at y drafodaeth ar y sesiynau cymorth y mae Cymdeithas Llywodraeth Leol Cymru yn bwriadu eu cynnal ar ddulliau sgriwtini a'r cyfarfod o'r Fforwm Cyswllt Cynghorau Tref a Chymuned a gynhelir y dydd Iau hwn 9 Gorffennaf fel materion o ddiddordeb i'r Pwyllgor yn codi o gyfarfod y Cadeiryddion a'r Is-Gadeiryddion Sgriwtini.
- Bod cyfarfodydd o'r Byrddau Rhaglen Trawsnewid yn mynd rhagddynt.
- Bod cyfarfod o Banel Sgriwtini mewn perthynas ag adolygiad achos Gwasanaethau Plant wedi cael ei gynnal. Roedd y Panel wedi ystyried amgylchiadau'r achos ynghyd â meysydd yn ymwneud â phroses, gweithdrefn a chyfathrebu a gwnaed argymhellion i wella ymarfer yn y

dyfodol. Dywedodd y Rheolydd Sgrwtini Dros Dro ei bod wedi cael trafodaeth gyda Phennaeth y Gwasanaethau Plant ynglŷn â'r dull mwyaf priodol o ddwyn y darn o waith hwn i ben ac adrodd yn ôl i'r Pwyllgor Sgrwtini Corfforaethol arno.

- Roedd Aelodau wedi cael eu diweddarau ar gynnydd mewn perthynas â symud ymlaen gyda'r prosiect Gweithio'n Gallach yn y sesiwn friffio fisol i Aelodau ar 2 Gorffennaf a bod hynny felly wedi cwrdd â chais y Pwyllgor hwn am eglurhad ar y mater yn y cyfarfod blaenorol ym mis Mehefin.
- Mewn perthynas â chais gan Aelod am adroddiadau llawnach i Sgrwtini ar faterion yn ymwneud ag Iechyd Meddwl Oedolion ac Anableddau Dysgu Oedolion, dywedodd y Rheolydd Sgrwtini Dros Dro ei bod wedi ymgynghori gyda Phennaeth y Gwasanaethau Oedolion mewn perthynas â rhoddi sylw i'r mater hwn a'i fod ef wedi dweud wrthi y bydd yn cyfarfod gyda'i Reolwyr Gwasanaeth yn o fuan i ystyried rhaglen o bynciau posibl mewn perthynas ag Iechyd meddwl oedolion ac anableddau dysgu oedolion y gellid eu cyflwyno i Sgrwtini drwy raglenni gwaith y ddau Bwyllgor. Ymgynghorwyd hefyd gyda Phennaeth y Gwasanaethau Plant oherwydd bod Iechyd meddwl oedolion yn faes sy'n cael effaith ar y gwasanaethau plant a mater penodol Iechyd meddwl plant a phobl ifanc. Roedd sawl maes yn y Gwasanaethau Plant wedi cael eu nodi gan gynnwys y Gwasanaeth Iechyd Meddwl i Blant a Phobl Ifanc yn eu Harddegau (CAMHS) i'w cynnwys fel eitemau ar raglenni gwaith y ddau Bwyllgor Sgrwtini. Ymgynghorir gyda Chadeiryddion y ddau Bwyllgor Sgrwtini ar rannu'r baich gwaith a sicrhau bod rhaglenni gwaith y naill Bwyllgor a'r llall yn gytbwys.

Nodwyd y diweddariad a dim camau gweithredu yn codi.

3. COFNODION 10 MEHEFIN 2015

Cyflwynwyd a chadarnhawyd fel rhai cywir, gofnodion y cyfarfod diwethaf o'r Pwyllgor Sgrwtini Corfforaethol a gynhaliwyd ar 10 Mehefin 2015.

4. ENWEBIAD I'R PANEL RHIANT CORFFORAETHOL

Cyflwynwyd er sylw'r Pwyllgor - adroddiad y Swyddog Sgrwtini yn gwahodd y Pwyllgor i enwebu un o'i Aelodau i wasanaethu ar y Panel Rhiant Corfforaethol am y flwyddyn ddinesig 2015/16. Yn yr adroddiad, cafwyd crynodeb o gylch gorchwyl a phwrpas y Panel Rhiant Corfforaethol ac argymhellwyd y dylid ail-enwebu y Cynghorydd Ann Griffith, sef deilydd y swydd ar hyn o bryd, sydd wedi datblygu dealltwriaeth o'r gwaith sy'n gysylltiedig.

Penderfynwyd ail-enwebu'r Cynghorydd Ann Griffith i wasanaethu ar y Panel Rhiant Corfforaethol am 2015/16.

5. TREFNIADAU'R AWDURDOD LLEOL I GEFNOGI'R BROSES O DDIOGELU PLANT

Cyflwynwyd er sylw'r Pwyllgor - adroddiad y Pennaeth Gwasanaethau Plant ar adolygiad Swyddfa Archwilio Cymru o drefniadau sicrwydd ac atebolrwydd yr Awdurdod ar gyfer sicrhau bod trefniadau corfforaethol priodol ar gyfer diogelu wedi cael eu sefydlu ac yn gweithio'n effeithiol. Roedd adroddiad llawn Swyddfa Archwilio Cymru ynghlwm fel Atodiad 1 i'r adroddiad ynghyd â Chynllun Gweithredu i fynd i'r afael ag argymhellion SAC yn Atodiad 2.

Dygodd y Rheolwr Gwasanaeth (Diogelu a Sicrwydd Ansawdd) sylw at yr isod fel pwyntiau allweddol i'r Pwyllgor -

- Mae nifer o'r argymhellion a wnaed yn adroddiad Swyddfa Archwilio Cymru eisoes wedi cael eu gweithredu.
- Mae polisi diogelu wedi cael ei fabwysiadu a Bwrdd Diogelu Corfforaethol wedi cael ei sefydlu.
- Er bod adroddiad Swyddfa Archwilio Cymru yn cydnabod bod yr Awdurdod wedi sefydlu nifer o brosesau a threfniadau, mae hefyd yn nodi angen i -
 - Gwblhau'r camau gweithredu yn y Cynllun Gweithredu Diogelu
 - Gynyddu perchenogaeth o'r agenda Ddiogelu ar draws y sefydliad.
 - Sefydlu'n gadarn sicrwydd sefydliadol ynghylch swyddogaeth ddiogelu'r Awdurdod Lleol yn y broses o gynllunio busnes, rheoli risgiau sefydliadol a fframweithiau rheoli perfformiad.

- Sicrhau fod sefydlu trefniadau sgrwtini ffurfiol a rheolaidd mewn perthynas â diogelu yn cael blaenoriaeth ynghyd â chadarnhau fod gwaith archwilio mewnol yn cael ei wneud yn rheolaidd ar ddiogelu.
- Bod proses i'r holl benaethiaid gwasanaeth nodi a llunio blaenoriaethau diogelu erbyn 2015/16 ar gyfer eu cynnwys mewn cynlluniau darparu gwasanaeth a fydd wedyn yn cael eu monitro drwy'r cerdyn sgorio Diogelu.
- Bydd adroddiad corfforaethol ar ddiogelu yn cael ei gyflwyno i'r Pwyllgor Sgrwtini Corfforaethol ac i'r Byrddau Rhanbarthol Diogelu Plant ac Oedolion bob blwyddyn.
- Mae angen cwblhau'r rhaglen hyfforddiant diogelu a'i defnyddio ar draws y Cyngor ac mae angen rhoddi sylw penodol i godi ymwybyddiaeth o faterion diogelu mewn perthynas ag oedolion a phlant gyda chyfeiriad penodol at fasnachu plant, camddefnyddio plant yn rhywiol, camdriniaeth yn y cartref a chaethwasiaeth fodern.
- Mae nifer o'r polisiau allweddol a restrir yn y Cynllun Gweithredu ar gyfer y Polisi Diogelu wedi cael eu hadolygu a'u diweddarau ac eithrio'r Polisi Gwirfoddoli, y Polisi Disgyblu a'r canllawiau ar ddefnyddio ataliaeth ac amser a bydd y rhain yn cael eu hadolygu yn unol â'r amserlenni a bennir yn y Cynllun Gweithredu.

Rhoes y Pwyllgor sylw i'r adroddiad gan mofyn sicrwydd mewn perthynas â'r canlynol

- Nododd y Pwyllgor fod SAC wedi dwyn sylw at y ffaith fod angen cwblhau ar frys saith o bwytiau gweithredu yng Nghynllun Gweithredu'r Polisi Diogelu sy'n ymwneud â hyfforddi staff ac Aelodau mewn materion diogelu sef gwaith sy'n mynd rhagddo a bod y Cyngor ychydig islaw'r cyfartaledd o ran nifer y bobl sydd wedi derbyn hyfforddiant ar ddiogelu yn y 6 mis diwethaf.
- Nododd y Pwyllgor hefyd, er bod SAC yn cydnabod bod ymrwymiad clir ar ran y Cyngor i wella, roedd y cynnydd yn araf deg. Dywedodd y Rheolwr Gwasanaeth (Diogelu a Sicrwydd Ansawdd) fod hyfforddiant ar faterion diogelu, yn y gorffennol, wedi canolbwyntio'n benodol ar staff y Gwasanaethau Plant ac Oedolion yn yr Adran Gwasanaethau Cymdeithasol a'i ymestyn i staff Gofal Cymdeithasol o asiantaethau eraill drwy'r Uned Datblygu'r Gweithlu. Mae angen gwella ymwybyddiaeth o faterion diogelu ymysg staff ar draws Gwasanaethau'r Cyngor a darparu hyfforddiant ar themâu diogelu penodol sy'n arbennig o gyfredol sef masnachu mewn pobl, camddefnyddio plant yn rhywiol, caethwasiaeth fodern ac ati. Meysydd yw'r rhain lle mae pwyslais cenedlaethol ar godi ymwybyddiaeth o risgiau i blant ac oedolion mewn cymunedau yn arbennig felly yng nghyd-destun achosion proffil uchel yn ddiweddar yn Rotherham a Swydd Oxford ynghyd ag achosion caethwasiaeth fodern y cafwyd gwybod amdanynt. Mae swydd Cydlynnydd Caethwasiaeth Fodern wedi cael ei sefydlu yn Heddlu Gogledd Cymru ac mae'n arwain prosiect penodol yn y maes hwn. Fodd bynnag, mae angen cynnal ychwaneg o sesiynau codi ymwybyddiaeth i staff allweddol yn y Cyngor a dylai Penaethiaid Gwasanaeth nodi staff allweddol y mae angen iddynt fod yn ymwybodol o faterion diogelu a'u deall.

Nododd y Pwyllgor yr eglurhad ac awgrymwyd y gall fod yn fuddiol ac yn ddefnyddiol efallai o ran codi ymwybyddiaeth o ddiogelu ar lefel gorfforaethol petai Cydlynnydd Caethwasiaeth Fodern Heddlu Gogledd Cymru yn cael gwahoddiad i roddi cyflwyniad i'r Cyngor Sir.

- Yn wyneb achosion y rhoddwyd cyhoeddusrwydd mawr iddynt yn ddiweddar ar gam-drin oedolion mewn unedau iechyd meddwl, gofynnodd y Pwyllgor am gadarnhad fod Gweithwyr Cymdeithasol yn Ynys Môn sy'n gysylltiedig â chyfeiriadau iechyd meddwl wedi cael eu hyfforddi a bod ganddynt sgiliau addas i nodi arwyddion camdriniaeth. Dywedodd Pennaeth y Gwasanaethau Oedolion fod pob Gweithiwr Cymdeithasol yn derbyn hyfforddiant diogelu i lefel briodol. Cydnabyddir bod angen i Weithwyr Cymdeithasol fod yn wylidwrus a bydd angen dwyn hyn at eu sylw.
- Cyfeiriodd y Pwyllgor at athrawon ysgol fel staff allweddol o ran diogelu a thanlinellwyd pwysigrwydd cael eu hatborth nhw ynghylch priodoldeb unrhyw gyfeiriadau y maent yn eu gwneud neu achosion y maent yn dwyn sylw atynt a'u bod yn dawl eu meddwl nad ydynt yn torri rheolau cyfrinachedd. Dywedodd y Rheolwr Gwasanaeth (Diogelu a Sicrwydd Ansawdd) bod y canllawiau ar gyfer staff dysgu mewn ysgolion a ryddhawyd ym mis Ionawr eleni - Cadw Disgyblion yn Ddiogel - yn fanwl o ran cyfrifoldebau staff dysgu mewn ysgolion mewn perthynas ag adrodd ynghylch pryderon gan nodi'n glir y llinellau adrodd a'r broses ar gyfer

gwneud cyfeiriadau i'r Gwasanaethau Cymdeithasol. Rhoddir sylw arbennig i barchu cyfrinachedd wrth rannu gwybodaeth gyda'r rheini sy'n gwneud y cyfeiriadau ac o ran cadw cofnodiadau.

- Oherwydd pwysigrwydd diogelu fel swyddogaeth a'r ffaith ei fod yn thema gyffredin, ystyriodd y Pwyllgor a fyddai'n cwrdd â'i gyfrifoldeb i sgrwtineiddio diogelu yn well drwy dderbyn Adroddiad Diogelu Corfforaethol Blynyddol gan y Pwyllgor llawn neu gan banel o Aelodau a fedrai roddi sylw manylach i'r adroddiad ac i ddiogelu fel pwnc. Cytunwyd y dylid sefydlu Panel Sgrwtini ar yr adeg briodol.

Penderfynwyd bod y Pwyllgor Sgrwtini Corfforaethol -

- **Yn argymhell bod y camau gwella a nodir yn Atodiad 2 yn yr adroddiad yn debygol o alluogi'r Awdurdod Lleol i gydymffurfio gyda'r argymhellion a wnaed gan Swyddfa Archwilio Cymru.**
- **Yn cytuno i fonitro cydymffurfiaeth gyda'r gofynion ac i ddal Cyfarwyddwr Statudol y Gwasanaethau Cymdeithasol yn atebol am eu cwblhau.**

CAMAU GWEITHREDU'N CODI: Y Rheolydd Sgrwtini Dros Dro mewn ymgynghoriad gyda Pennaeth y Gwasanaethau Oedolion, Pennaeth y Gwasanaethau Plant a'r Rheolwr Gwasanaeth (Diogelu a Sicrwydd Ansawdd) i wneud trefniadau i gynnal Panel o'r Pwyllgor hwn i sgrwtineiddio adroddiad blynyddol ar ddiogelu corfforaethol ar yr adeg briodol.

6. MONITRO PERFFORMIAD – CERDYN SGORIO CORFFORAETHOL CHWARTER 4

Cyflwynwyd er sylw'r Pwyllgor - adroddiad y Rheolydd Sgrwtini Dros Dro ar faterion a oedd yn parhau i fod angen sylw yn codi o'r cerdyn sgorio corfforaethol am Chwarter 4. Yn yr adroddiad, nodwyd ymateb y gwasanaeth i danberfformiad yn erbyn y 3 dangosydd perfformiad a nodir isod sy'n ffurfio cyfres o 6 o DP yr oedd y Pwyllgor Gwaith wedi eu cyfeirio i'r Pwyllgor i'w sgrwtineiddio o Ch4 (rhoddwyd sylw i'r 3 cyntaf yng nghyfarfod o'r Pwyllgor ar 10 Mehefin):

- SCA/01b – canran gofalgwyr oedolion sydd wedi cael asesiad neu adolygiad o'u hanghenion yn ystod y flwyddyn.

Rhoes Pennaeth y Gwasanaethau Oedolion eglurhad o ran y targed a gollwyd a chyfeiriodd yn benodol at nifer y gofalgwyr a oedd wedi gwrthod asesiad (348) ac sydd hefyd yn cael eu cofnodi gan y dangosydd, fel ffactor dylanwadol allweddol yn y tanberfformiad yr adroddwyd arno. Dywedodd y Swyddog, o'r rheini a gytunodd i dderbyn asesiad yn 2014/15, roedd 564 (neu 92%) wedi derbyn asesiad yn y flwyddyn. Pan gaiff y rheini a wrthododd asesiad (348) eu ffactora i mewn, mae'r ganran yn gostwng i 57.1%

Nododd a derbyniodd y Pwyllgor yr eglurhad a gafwyd.

Gwnaed pwynt ynglŷn â'r angen i weithredu rhaglen hyfforddiant gynlluniedig ynghylch Alzheimer a Dementia yn y Cyngor. Awgrymwyd y byddai'n ddefnyddiol i'r Cyngor fod mewn sefyllfa i gyflwyno ei hun fel sefydliad sy'n ymwybodol o anghenion unigolion gydag Alzheimer a Dementia ac sydd wedi datblygu rhaglen hyfforddiant penodol. Dywedodd y Cyfarwyddwr Cymuned y byddai'n rhoi sylw i'r mater hwn sy'n berthnasol o ran y Rhaglen Ranbarthol a Rhaglen Drawsnewid y Cyngor ei hun a hefyd yng nghyd-destun y Ddeddf Iechyd a Llesiant(Cymru).

- LCL/004 – nifer y deunyddiau llyfrgell a roddwyd allan yn ystod y flwyddyn.

Soniodd y Pennaeth Dysgu am yr isod fel ystyriaethau lliniarol -

- Er bod perfformiad yn erbyn y dangosydd wedi gostwng, gwelwyd cynnydd o 73k yn nifer yr ymweliadau i wasanaethau llyfrgelloedd. Nid yw pawb sy'n ymweld yn benthycia eitemau ymhob achos gyda nifer yn defnyddio gwasanaethau eraill megis y cynnig o gyngor ac ymchwil, ymholiadau a defnyddio cyfrifiaduron.

- Bydd y Gwasanaeth yn adrodd am y tro cyntaf eleni ar ddeunyddiau a “e-fenthyciwyd” a rhagwelir y bydd gwelliant sylweddol o ran nifer yr eitemau a roddwyd allan hefyd yn sgil lansio'r gwasanaeth e-adnodd newydd drwy Gonsortium Caffael Cymru Gyfan.
- Mae cyswllt clir rhwng y Gronfa Lyfrau a nifer y deunyddiau a roddir allan yn Ynys Môn gyda'r Gronfa Lyfra yn cael ei nodi fel isel yn adroddiad CYMAL am 2013/14. Cafodd cais i ddefnyddio cronfeydd wrth gefn canolog i ychwanegu at y Gronfa Lyfrau yn ystod 2015/16 ei wrthod.

Nododd y Pwyllgor y sefyllfa gan dderbyn yr eglurhad a roddwyd o'r perfformiad yn erbyn y dangosydd.

- LCS/002b – nifer yr ymweliadau i ganolfannau chwaraeon a hamdden yr Awdurdod Lleol yn ystod y flwyddyn lle bydd yr ymwelydd yn cymryd rhan mewn gweithgaredd corfforol.

Dywedodd y Prif Swyddog Hamdden y gellir priodoli'r tanberfformiad yn erbyn y dangosydd hwn yn bennaf i gau Canolfan Hamdden Caergybi am 6 wythnos yn ystod Ch4 oherwydd prosiect cyfalaf i wella cyfleusterau. Yn ychwanegol at hynny, oedd y modd y cofnodwyd yn anghywir bresenoldeb disgyblion ysgol yng Nghanolfannau Hamdden Caergybi ac Amlwch oherwydd problem dechnegol gyda system reoli trefniadau llogi electronig y Canolfannau Hamdden. Dywedodd y Swyddog ei fod yn gobeithio medru adrodd ar yr ystadegau diwygiedig pan gaiff y rheini eu cadarnhau a'i fod yn hyderus y bydd y targed wedi ei gyflawni yn seiliedig ar ffigurau'r gorffennol ar gyfer cyfraddau presenoldeb disgyblion ysgol.

Nododd a derbyniodd y Pwyllgor yr eglurhad. Yn ogystal, gwnaethpwyd y pwynt gan y Pwyllgor nad yw canolfannau hamdden y Sir a'r cyfleusterau y maent yn eu darparu yn cael eu hysbysebu'n ddigonol fel rhan o lenyddiaeth twristiaeth a digwyddiadau'r Awdurdod. Awgrymwyd y byddai rhoddi proffil uwch i'r canolfannau hamdden a'r pyllau nofio yn hybu niferoedd presenoldeb a lefelau incwm ar adeg pan mae adnoddau dan bwysau. Awgrymwyd ymhellach y dylid ystyried gwahodd swyddog o Adain Dwristiaeth yr Awdurdod i roddi cyflwyniad i'r Pwyllgor ar y strategaethau cyfredol ar gyfer hyrwyddo yr amrediad o atyniadau a chyfleusterau sydd ar gael ar yr Ynys.

Penderfynwyd nodi'r cyd-destun a'r gweithgareddau lliniarol mewn perthynas â pherfformiad yn erbyn y 3 dangosydd perfformiad a amlinellir ym mharagraffau 3.1, 3.2 a 3.3 yr adroddiad.

CAMAU GWEITHREDU'N CODI: Y Prif Swyddog Hamdden i adrodd yn ôl i'r Pennaeth Adfywio Economaidd a Chymunedol o ran priodoldeb rhoddi i'r canolfannau hamdden a'r pyllau nofio mwy o amlygrwydd yn llenyddiaeth twristiaeth yr Awdurdod.

7. ADRODDIAD PERFFORMIAD BLYNYDDOL DRAFFT 2014/15

Cyflwynwyd i'r Pwyllgor ei ystyried – ddrafft cychwynnol o Adroddiad Perfformiad Blynyddol 2014/15. Mae'r adroddiad yn asesu cynnydd y Cyngor yn erbyn ei amcanion gwella am 2014/15 fel y cânt eu hamlinellu trwy'r saith maes allweddol a nodwyd yn Nogfen Cyflawni Blynyddol 2014/15.

Dywedodd y Rheolwr Rhaglen a Chynllunio Busnes wrth y Pwyllgor fod yr Adroddiad Perfformiad drafft wedi cael ei gyflwyno i'r Uwch Dîm Arweinyddiaeth ynghyd â Swyddfa Archwilio Cymru sydd wedi darparu sylwadau cychwynnol ar y cynnwys. Bydd perfformiad yn cael ei ddadansoddi ymhellach pan fydd gwybodaeth gymharol ynghylch perfformiad ar draws Awdurdodau Cymru ar gael rhyw bryd yn ystod mis Awst i fis Medi.

Wedi rhoddi sylw cychwynnol i'r adroddiad drafft, daeth y Pwyllgor i'r canlyniad nad oedd mewn sefyllfa yn y cyfarfod hwn i wneud cyfiawnhad â'i gynnwys a hynny oherwydd prinder amser ac oherwydd nad oedd gwybodaeth gymharol ar gael gan olygu nad oedd gan y Pwyllgor y darlun llawn a'r data cyflawn i fedru sgrwtineiddio'r adroddiad mewn modd ystyrlon. Nodwyd y bydd yr adroddiad perfformiad yn cael sylw gan y Pwyllgor yn ei gyfarfod ar 14 Medi ond wedi deall na fydd y wybodaeth lawn ynghylch perfformiad efallai ar gael ar gyfer ei gyhoeddi gydag agenda'r cyfarfod hwnnw, ac yn dilyn trafodaeth bellach, awgrymwyd y dylid cynnal cyfarfod ychwanegol o'r Pwyllgor ar adeg a fyddai'n galluogi'r Pwyllgor i roddi sylw i'r adroddiad perfformiad blynyddol terfynol fel y gall sefydlu lle

y mae'r Awdurdod, lle y mae angen iddo fod, sut y bydd yn cyrraedd yno a sut y mae'n cymharu ag awdurdodau lleol eraill yng Nghymru.

Penderfynwyd gohirio'r drafodaeth ar Adroddiad Blynyddol 2014/15 i gyfarfod yn y dyfodol.

CAMAU GWEITHREDU'N CODI: Y Rheolydd Sgrwtini Dros Dro i ymgynghori gyda'r Rheolwr Rhaglen a Chynllunio Busnes a'r Cadeirydd i gytuno ar adeg addas i'r Pwyllgor ystyried Adroddiad Perfformiad Blynyddol terfynol 2014/15.

8. MATRICS SGORIO STRATEGAETH GYFALAF 2015

Cyflwynwyd er sylw'r Pwyllgor - adroddiad y Pennaeth Swyddogaeth a'r Swyddog Adran 151 Dros Dro yn ymgorffori Strategaeth Gyfalaf 2015 a'r atodiadau cysylltiedig â'r Matrics Cyfalaf ar gyfer sgorio bidiau cyfalaf.

Wedi cael eglurhad ar rai pwyntiau mewn perthynas â'r matrics sgorio ac wedi awgrymu y dylid diwygio aelodaeth y Grŵp Tir ac Asedau Adeiledig Corfforaethol i adlewyrchu'r Uwch Reolwyr presennol, croesawodd y Pwyllgor gyflwyno'r matrics sgorio cyfalaf fel cam cadarnhaol o ran blaenoriaethu a monitro prosiectau cyfalaf.

Penderfynwyd nodi a chefnogi matrics sgorio cyfalaf a'r strategaeth TGCh ar gyfer blwyddyn ariannol 2016/17 fel y cawsant eu cyflwyno.

DIM CAMAU GWEITHREDU PELLACH YN CODI

9. BLAENRAGLEN WAITH

Cyflwynwyd er sylw a sylwadau – Blaenraglen Waith diweddaredig y Pwyllgor am 2015/16.

Dygodd y Rheolydd Sgrwtini Dros Dro sylw'r Pwyllgor at newidiadau i'r Rhaglen Waith fel a ganlyn -

- Gohirio ar gais y Gwasanaeth, yr Adolygiad ar y Gwasanaeth Llyfrgelloedd i'r cyfarfod o'r Pwyllgor ym mis Chwefror 2016. Gan fod yr Aelodau wedi cael diweddariad ar y pwnc hwn yn y sesiwn frifio fisol i Aelodau ar 2 Gorffennaf, ystyriwyd ei fod yn ddianghenraid i'w ystyried yn ffurfiol hefyd gan y Pwyllgor yn y cyfarfod hwn. Adroddir ar yr adolygiad o'r Gwasanaeth Llyfrgelloedd i'r Pwyllgor Gwaith y mis hwn gyda golwg ar ymgynghori a bydd canlyniad y broses yn cael ei gyflwyno i'r Pwyllgor Sgrwtini ym mis Gorffennaf ynghyd â chynigion penodol y Gwasanaeth.
- Mae'r Gofrestr Risg Gorfforaethol wedi cael ei chynnwys fel eitem ychwanegol ar gyfer cyfarfod yr Pwyllgor a gynhelir ym mis Mawrth 2016.

Penderfynwyd nodi a derbyn y Blaenraglen Waith ddiweddaredig.

DIM CAMAU GWEITHREDU PELLACH YN CODI

**Y Cynghorydd R. Meirion Jones
Cadeirydd**